



IROMAG

Odlazni studenti



U OVOM BROJU

1.MART – DAN NEZAVISNOSTI BOSNE I HERCEGOVINE

PREDAVANJE SA RADIONICOM I DISKUSIJOM

**NAJUSPJEŠNIJI SPORTAŠI
GRADA MOSTARA ZA 2024.
GODINU: LANA PUDAR I PROF.
DR. DAMIR DJEDOVIĆ**

STUDENTSKI IFTARI

**PREDSTAVLJENA IZDAVAČKA
DJE LATNOST FAKULTETA
HUMANISTIČKIH NAUKA**

**MARKETARI EKONOMSKOG
FAKULTETA**

DAN NEZAVISNOSTI BOSNE I HERCEGOVINE

by IROUNMO

1.mart je datum koji za Bosnu i Hercegovinu ima poseban historijski značaj. Tog dana, 1992. godine, Bosna i Hercegovina je proglasila svoju nezavisnost. Dan nezavisnosti Bosne i Hercegovine predstavlja simbol slobode, autonomije i odlučnosti naroda ove zemlje da kroji svoju sudbinu u skladu sa vlastitim interesima, bez spoljnog uplitanja.

Na 1. mart 1992. godine održan je referendum na kojem su građani Bosne i Hercegovine, većinom glasova, izrazili želju za nezavisnošću. Više od 99% onih koji su izašli na referendum glasali su za samostalnost, što je predstavljalo jasan signal međunarodnoj zajednici o volji naroda ove zemlje. Iako je referendum bio sproveden u složenim političkim okolnostima, sa značajnim napetostima i protivljenjem određenih etničkih zajednica, njegova je odluka bila neupitna: Bosna i Hercegovina postaje nezavisna.

Predavanje sa radionicom i diskusijom: „Ljudska prava, zabrana diskriminacije i rodna ravnopravnost, sa osvrtom na sprječavanje i borbu protiv rodno zasnovanog nasilja“



Povodom obilježavanja 8. marta – Međunarodnog dana žena, u okviru UNIGEM projekta, organizovano je predavanje sa radionicom i diskusijom pod nazivom „Ljudska prava, antidiskriminacija i ravnopravnost spolova, s posebnim naglaskom na prevenciju i borbu protiv nasilja zasnovanog na spolu“. Predavanje je održala profesorica dr. Rebeka Kotlo, koordinatorica UNIGEM projekta na Univerzitetu, u srijedu, 5. marta 2025. godine, s početkom u 14:00 sati na Pravnom fakultetu.

Tokom predavanja, učesnici su analizirali ljudska prava, zabranu diskriminacije, rodnu ravnopravnost u pravnom sistemu, značenje obilježavanja Međunarodnog dana žena, nasilje nad ženama, borba protiv rodno zasnovanog nasilja, zaštita i kršenje ljudskih prava žena, a posebno sa aspekta nasilja nad ženama te zaštita žena žrtava trgovine ljudima.

Projekat "Uvođenje rodno osviještenih politika u visoko obrazovanje" (UNIGEM) finansijski podržava Ambasada Ujedinjenog Kraljevstva, a njegovu implementaciju koordinira TPO fondacija te projekat provodi u partnerstvu sa 20 univerziteta u Bosni i Hercegovini, Srbiji, Hrvatskoj i Crnoj Gori, među kojima je i Univerzitet „Džemal Bijedić“ u Mostaru.

Projekat se implementira sa ciljem prevencije i borbe protiv rodno zasnovanog nasilja, diskriminacije i seksualnog uznemiravanja te osiguranja integriteta i kvaliteta u visokom obrazovanju.

Najuspješniji sportaši Grada Mostara za 2024. godinu: Lana Pudar i prof. dr. Damir Djedović



16. 03. 2025.godine, Sportska udruga Grada Mostara organizovala je svečanu manifestaciju u hotelu Mepas na kojoj su proglašeni najuspješniji sportisti Grada Mostara za 2024. godinu.

Peti put zaredom, Grad Mostar je za najbolju sportašicu proglasio atletičarku Lanu Pudar. Treći put zaredom, Grad Mostar je za najboljeg trenera proglasio prof. dr. Damira Djedovića, glavnog trenera Kluba Orka i zaposlenika na Nastavničkom fakultetu Univerziteta "Džemal Bijedić" u Mostaru.

Ove nagrade ne odražavaju samo sportske uspjehe, već i prepoznaju posvećenost koju sportaši i treneri ulažu u razvoj sporta na lokalnoj i međunarodnoj razini. Svojim angažmanom u Klubu Orka, prof. dr. Damir Djedović doprinosi razvoju zajednice i predstavlja Univerzitet na najvišim nivoima. Njegov rad kao trenera Kluba Orka i profesora na Nastavničkom fakultetu kontinuirano unapređuje sportski i akademski napredak.

Studentski iftari

By IROUNMO

PMjesec Ramazan, period duhovne obnove, zajedništva i solidarnosti, uspješno seprivodi kraju, ostavljajući za sobom brojne trenutke ispunjene toplinom i međusobnom podrškom. Jedan od najznačajnijih projekata u ovom periodu bio je Besplatni studentski iftari, inicijativa Unije studenata, koja je imala za cilj pružiti iftar i osjećaj pripadnosti studentima koji poste daleko od svojih porodica i domova. Ovaj projekat bio je posebno važan za studente koji borave u studentskim domovima ili privatnom smještaju izvan Mostara, omogućavajući im da osjete duh zajedništva i bliskosti tokom svetog mjeseca.



Zahvaljujući velikodušnoj podršci donatora, u proteklih mjesec dana studenti su svake večeri imali priliku iftariti u atmosferi ispunjenoj prijateljstvom, zahvalnošću i međusobnim povezivanjem. Svaki iftar nije bio samo obrok, već i prilika za upoznavanje, razmjenu iskustava i osnaživanje studentske zajednice. U prosjeku, između 80 i 90 studenata svake večeri okupljalo se na zajedničkim iftarima, dijeleći radost i blagodat ovog posebnog vremena.

Ovaj projekat još jednom je pokazao snagu zajedništva i važnost nesebične podrške među studentima, potvrđujući da je Ramazan mnogo više od posta – to je vrijeme ljubavi, brige i međusobnog pomaganja.

Predstavljena izdavačka djelatnost Fakulteta humanističkih nauka

By IROUNMO

U amfiteatru Srednje škole Konjic, u srijedu, 12. marta 2025. godine, predstavljena je izdavačka djelatnost Fakulteta humanističkih nauka. Tom prilikom, dekan fakulteta prof. dr. Edim Šator, zajedno s prof. dr. Dijanom Hadžizukić i prof. dr. Lejlom Žujo-Marić, govorio je o značaju naučnoistraživačkog rada. Poseban naglasak stavljen je na ulogu humanističkih nauka u savremenom, često tehnički orijentisanom društvu, kao i na važnost bosnističkih istraživanja na našim prostorima.

Tokom događaja predstavljene su naučne monografije i udžbenici iz oblasti bosnistike, anglistike, germanistike, historije i komunikologije, objavljeni u posljednjih pet godina. Također su promovisani naučni časopisi "Istraživanja" i "Hercegovina", koje Fakultet humanističkih nauka izdaje samostalno ili u saradnji s Muzejom Hercegovine i Hercegovačkim arhivom, kao i zbornici radova nastali nakon međunarodnih naučnih skupova koje je fakultet organizovao u proteklom periodu.

Događaj je zaključen donacijom 19 knjiga, koje su, nakon razgovora s učenicima završnih razreda, poklonjene biblioteci škole.



Marketari ekonomskog fakulteta

By IROUNMO

Studenti Ekonomskog fakulteta Univerziteta „Džemal Bijedić“ u Mostaru imali su priliku učestvovati u inspirativnoj radionici na temu „Kako izgraditi web stranicu optimiziranu za digitalni marketing“, koju je u srijedu, 12. februara 2025. godine, održala Irma Kajan, stručnjakinja za digitalni marketing i web dizajn. Ovu radionicu organizovali su studenti Ekonomskog fakulteta u sklopu predmeta Marketing, s ciljem povezivanja teorijskih znanja sa praktičnim iskustvima iz realnog poslovnog okruženja.

Irma Kajan svoje interesovanje za ovu oblast razvila je upravo tokom studija na Ekonomskom fakultetu, gdje je stekla temeljna znanja koja su joj omogućila uspješnu karijeru u dinamičnom svijetu digitalnog marketinga. Kroz podršku fakulteta i angažman na različitim projektima, uspjela je izgraditi prepoznatljiv profesionalni put i postati priznato ime u industriji.

Tokom radionice, studenti su stekli konkretna i primjenjiva znanja iz oblasti web dizajna i digitalnog marketinga. Fokus je bio na ključnim principima izgradnje funkcionalnih i vizualno privlačnih web stranica, kreiranju sadržaja prilagođenog ciljnim grupama, kao i strategijama optimizacije koje omogućavaju bolju vidljivost na internetu i privlačenje potencijalnih kupaca.

Ovaj edukativni događaj bio je izuzetno koristan za studente, jer im je omogućio da povežu teorijska znanja sa praktičnim vještinama koje su neophodne u savremenom poslovnom okruženju. Radionica je ujedno poslužila i kao inspiracija mladim budućim stručnjacima da prepoznaju potencijal digitalnog marketinga i web dizajna kao perspektivnih karijernih pravaca.



IROMAG



/iro.unmo



@iro.unmo



/iro.unmo

IROMAG TEAM
MIRSADA BEHRAM
LEJLA ŠKALJIĆ
AMILA VRTIĆ
HUSEIN MARIĆ

